



Kamis, 20 Oktober 2022
Ogen: Roma 12:2



PERUKUREN SIPELIMBARUI



Ukur eme ulu si nggerakken kegeluhen manusia, subuk siilakoken ntah pe ibelasken. Megati lit kalak erbelas, la kin rukur, ukuri lebe maka belasken, ntah latih kal rukur. Sienda tuhu ngataken maka ukur enda mbelin mpengaruhi kegeluhen manusia. Adi ukurna mehuli ras cara rukurna rembang tengah maka sikap ulihna subuuk man dirina jine bagepe kalak sideban.

Bageme rasul Paulus nehken pedahna man perpulungen Roma, kuga kin arusna geluh kalak Kristen. La banci seri ras doni enda. Konteks kegeluhen masyarakat melala erbagenana, si jahat, si nembah dibata sideban, si rubati. Sie kerina la man usihen, adi bage biak ras perbahanen perpulungen Roma berarti seri ia ras doni. Kuga carana maka kalak sitek jadi kalak si istimewa, si arus iusih ibas kerina lagu langkahna eme perukurena arus ipelimbarui Dibata. Kuga carana perukuren e ipelimbarui? Arus nggit iajari, nggit ngubahken lagu langkah, Kesah Si Badia singkuasai ukurna alu bage kerina siiukurina eme kerna kerina simehuli, singena ate Dibata ras e kerina si sempurna. Kalak si la nggit ipelimbarui ukurna pasti geluhna bagi ate-atenana saja, la Dibata si ngaturken geluhna.

Perenungen man banta, enggo nge ipelimbarui perukurenta? Adi enggo tentuna geluhta ncidahken ras ndalanken biak simehuli, perayakenta kerina singena ate Dibata janah tentu ngena ate manusia. Tapi singena ate manusia langa bo tentu ngena ate Dibata. Alu bage iarapken wari ku wari kita tetap ipelimbaru janah reh beluhna rukur, ngukuri kerina si mehuli alu bage kerina simehuli ndai nggerakken geluhta. Sabab alu ipelimbaruina perukurenta maka ulihna pe kegeluhen simbaru ibas Kristus. Tentuna kerina si mbaru ngena ate kalak.

➤ *Kalak singgit ipelimbarui eme si mesikel nandangi si mehuli*